

## *Djelovanje Komunističke partije tokom oslobodilačkog rata u Blatu na Korčuli*

U 1941. godini postojali su u Blatu jedan Kotarski komitet sa sedam članova, jedan Mjesni komitet sa sedam članova i osam teritorijalnih partijskih ćelija sa 69 članova, 40 kandidata i oko 150 simpatizera Partije. U toku 1941. godine formirao se je i Mjesni komitet SKOJ-a sa pet članova i 66 skojevaca. U 1942. godini djeluje u Blatu jedan Kotarski komitet sa sedam članova, jedan Mjesni komitet sa sedam članova, osam teritorijalnih partijskih ćelija sa 42 člana, 32 kandidata i 150 simpatizera Partije, jedan Mjesni komitet SKOJ-a sa pet članova i 69 skojevaca. U 1943. godini djeluje također jedan Kotarski komitet sa šest članova, jedan Mjesni komitet sa četiri člana, četiri teritorijalne partijske ćelije sa 37 članova, 40 kandidata i 200 simpatizera Partije, jedan Mjesni komitet SKOJ-a sa četiri člana i 40 skojevaca a oformljen je također i jedan Kotarski odbor AFŽ sa četiri člana Partije, jedna Komanda mjesta sa četiri člana Partije, tri partijske ćelije sa 11 članova Partije. U 1944. godini djeluje u Blatu jedan Kotarski komitet sa sedam članova, jedan Mjesni komitet sa četiri člana, četiri teritorijalne partijske ćelije sa 32 člana, 15 kandidata i 20 simpatizera Partije, jedan Kotarski komitet SKOJ-a sa tri člana, jedan Mjesni komitet SKOJ-a sa četiri člana i 45 skojevaca, jedan Kotarski odbor AFŽ sa četiri člana, jedan Mjesni odbor AFŽ sa tri člana, jedna Komanda mjesta sa četiri člana Partije i četiri partijske organizacije sa 11 članova Partije. Kotarski NOO sa jednom partijskom ćelijom i 6 članova Partije. U 1945. godini postoji jedan Mjesni komitet sa sedam članova, jedan Mjesni komitet SKOJ-a sa četiri člana, jedan Općinski NOO sa jednom partijskom ćelijom i 6 članova Partije, jedna Radna četa sa jednom partijskom organizacijom i 23 člana i 15 kandidata Partije. Ukupno je u općini Blato na Korčuli u 1945. godini bilo 13 osnovnih partijskih organizacija sa 164 člana i oko 150 kandidata Partije.

Od početka narodnog ustanka na otoku Korčuli protiv talijanskog okupatora i njegovih slugu, pored komunista koji su bili na čelu ustanka dizale su se i narodne mase, posebno pak omladina, koja je bila prva uz Komunističku partiju te i žene našeg kraja.

U dizanju ustanka na otoku Korčuli imali smo narodne mase, koje su stale uz Partiju, tako se je ustanak na Korčuli širio i sve više jačao. Naša omladina koja je uvijek bila pripravna, nestrpljivo je čekala poziv Partije i svoje skojevske

organizacije da se bori protiv talijanskog i njemačkog okupatora kako i njegovih slugu, domaćih izdajnika. Omladinu je učila Partija i skojevska organizacija i pripremala je za borbu protiv neprijatelja naše zemlje.

Omladina je uvijek bila prva, koja je neustrašivo napadala na neprijateljske bunkere, tankove i njihove utvrde širom zemlje. Omladina sa otoka Korčule nalazila se u svim našim jedinicama NOV i POJ, oni nisu žalili svoje mlade živote i ako je borba bila duga i teška uvijek su bili prvi i tamo gdje je bilo najteže.

Na svakom predjelu na Korčuli su se vodile bobre protiv talijanskog i njemačkog okupatora i domaćih izdajnika. U svakoj akciji protiv okupatora omladina je uvijek bila prva u borbi sve do oslobođenja.

Također i žene otoka Korčule koje su stale rame uz rame sa komunistima i omladinom, borile su se puškom u ruci do konačne pobjede. Naše žene su radile u pozadini kupeći odjeću, hranu, obuću, municiju, sanitetski materijal kao i plele čarape za našu vojsku, te sve što je bilo potrebno za NOV i Narodnu vlast. Iz ondašnje omladinske organizacije danas imamo Narodnih heroja, sekretara Savezne vlade, admirala, te veći broj oficira JNA raznih činova itd.

U toku NOP i narodne revolucije na Korčuli narod se je okupljao oko komunista i slijedio njihove korake od prvih dana ustanka pa do danas, davao je za našu vojsku do posljednjeg svoga zaloga. Radi pomaganja NOP i partizana narod Korčule bio je mučen, proganjan, ubivan i odvođen u razne logore po Jugoslaviji, Italiji i Njemačkoj, ali se nije pokolebao već se je jače zbivao oko Partije, Narodnog fronta i Narodne vlasti. Ni mučenja, ni zatvori, ni progonstva nisu narod Korčule razočarali već je on bio sve čvršći u borbi protiv neprijatelja sve do konačne pobjede i oslobođenja naše zemlje.

U svakom selu na Korčuli bila je partijska organizacija, kao i sve druge organizacije i uspostavljena Narodna vlast. Svaka kuća po selima na Korčuli dala je bar po jednog borca a iz nekih kuća pogotovo u Blatu bilo je po 4—5 boraca. Eto tako se je razvijala organizacija u Blatu i na cijelom otoku Korčuli, gdje je Blato bilo žarište rada i organizacije u dizanju ustanka 1941. godine, pak i dalje sve do oslobođenja zemlje i njene poslijeratne obnove.